

- केंद्र मांय सरकार बणावण रा सिलसिला मांय सियासी हलचल तेज व्ही।
- राज्य सरकार न्यारा-न्यारा महकमा मांय लारला पांच साल मांय भर्ती व्हा कर्मचारियां रा कागजातां री जांच सारू महकमां री आंतरिक समितियां बणावण रा हुकम दीना।
- राज्यपाल कलराज मिश्र जनजातीय हलकां मांय सामाजिक, आर्थिक अर शैक्षणिक विकास सारू तेज गति ऊं काम करण माथे जोर दीनो।
- राज्य रा घणखर हलकां मांय लू रो असर खत्म व्ह्यो-काल ऊं 9 जून ताई अजमेर, जयपुर, कोटा अर भरतपुर संभाग मांय कठे-कठे हल्की बारिश रा आसार।

000

केंद्र मांय सरकार बणावण रा सिलसिला मांय भारतीय जनता पार्टी रा अध्यक्ष जगत प्रकाश नड्डा आज नई दिल्ली मांय पार्टी रा आला नेतावां सागे मीटिंग कीनी। इण मांय अमित शाह, राजनाथ सिंह, पीयूष गोयल, मनसुख मांडविया, प्रल्हाद जोशी, अश्विनी वैष्णव अर भाजपा रा राष्ट्रीय महासचिव तरुण चुग, पार्टी रा नेता विनोद तावड़े अर दूजा आला नेता मौजूद रह्या। जनता दल यूनाइटेड रा केई नेता ई दिल्ली मांय पार्टी रा अध्यक्ष अर बिहार रा मुख्यमंत्री नीतीश कुमार सागे मीटिंग कीनी। एनडीए मांय शामिल पार्टियां री मीटिंग काल नई दिल्ली मांय बुलायी ज्यी है। दूजी कानी इंडिया गठबंधन रा नेतावां री ई आज नई दिल्ली मांय मीटिंग व्ही। तृणमूल कांग्रेस रा राष्ट्रीय महासचिव अर सांसद अभिषेक बनर्जी अर पार्टी रा नेता डेरेक ओ ब्रायन समाजवादी पार्टी रा मुखिया अखिलेश यादव सागे मुलाकात कीनी। आम आदमी पार्टी रा नेता अर राज्यसभा सांसद राघव चड्ढा शिवसेना (यूबीटी) रा नेता संजय राउत सागे मीटिंग कीनी।

00000

चुनाव आयोग लोकसभा चुनाव री प्रक्रिया रे दौरान लाग्योडी चुनाव आदर्श आचार संहिता हटा लीनी है। ई सारू आयोग आज पानडी जारी कीनी। पानडी रे मुजब कर्नाटक, महाराष्ट्र अर तेलंगाना रा कुछ विधानसभा चुनाव हलका मांय उप चुनाव रे कारण वठे आदर्श आचार संहिता लागू रेहवेला। ई बीचे लोकसभा सारू नुवा चुणी ज्या सांसदां रो पंजीकरण ऑनलाइन इंटरग्रेटेड सॉफ्टवेयर एप्लीकेशन रे मार्फत कर्यो जावेला। लोकसभा सचिवालय आं सदस्यां सारू एस बी आई बैंक खातो खोलण, स्थाई पहचान पत्र अर केन्द्र सरकार स्वास्थ्य योजना कार्ड जारी करण सारू आज ऊं 14 जून ताई थावर अर दीतवार समेत रोजीना संवारे आठ ऊं रात आठ बज्यां ताई काम करेला। सदस्यां रे ठहराव री अस्थायी व्यवस्था वैस्टर्न कोर्ट एनेक्सी होस्टल, राज्य अर केन्द्रशासित भवनां अर अतिथि घरां मांय करी ज्यी है।

00000

राज्य सरकार न्यारा-न्यारा महकमां मांय लारला पांच साल मांय भर्ती व्हा कर्मचारियां रा कागजात री जांच सारू सगळा महकमां ने आंतरिक समिति बणावण रा हुकम दीना है। कार्मिक विभाग रा प्रमुख शासन सचिव हेमन्त गेरा सगळा महकमां ने हुकम जारी कर र आन्तरिक कमेटी ऊं परीक्षा देवण वाळा अर नौकरी करण वाळा रे एक ही जणो व्हेवण री जांच करण बाबत् कह्यो।

ई सागे ई भर्ती करी ज्या कर्मचारियां री शैक्षणिक पात्रता ऊं जुड्या कागजात अर अर्जी सागे पेश करी ज्या फोटो अर दस्तखत री जांच ई करण बाबत कही ज्यो है।

00000

राज्य सरकार बीकानेर जिला रा हाडला बरसिंगसर रा गैप एरिया मांय बजरी, सिलिका सेंड अर क्ले रा भण्डार ने ध्यान राखता थकां ई हलका मांय प्लॉट तैयार कर र नीलामी करण री मंजूरी दे दीनी है। खान सचिव आनंदी बतायो के बीकानेर रा हाडला बरसिंगसर रा 272 वर्ग किलोमीटर अर भाने का गांव, लौहिया समेत 319 वर्ग किलोमीटर हलका ने अनारक्षित कर दिया ज्या है। इण ऊं बीकानेर, चुरु, श्रीगंगानगर अर हनुमानगढ़ समेत आरे सारे रा हलका मांय बणाई-चुणाई सारू रेत आसानी ऊं मिल सकेला।

00000

राज्य मांय अनुसूचित जाति अर जनजाति रा बेरोज़गार नौजवानां सारू 01 जुलाई ऊं खास कोचिंग योजना सरू करी जावेला। 12 महीना तांई चालण वाळी ई योजना रा तैत 80 बेरोज़गार नौजवानां ने न्यारी-न्यारी प्रतियोगी परीक्षावां री मुफ्त कोचिंग दी जावेला। ई सारू कोचिंग कक्षावां लगावण री मर्जी राखण वाळा कोचिंग संस्थान काल तांई अर्जी दे सके है। अ संस्थान अंग्रेजी, कम्प्यूटर बेसिक, अंग्रेजी टाइपिंग, सामान्य जागरुकता अर अंग्रेजी अर हिंदी मांय स्टेनोग्राफी री सिखावण दे सकेला।

00000

राज्यपाल कलराज मिश्र राज्य रा जनजाति हलकां मांय सामाजिक, माली अर भणाई-लिखाई रा हलकां मांय तेजी ऊं विकास सारू कोशिश करण माथे ज़ोर दीनो है। वे आज जयपुर रा राजभवन मांय जनजाति कल्याण सारू चलायी जा रही योजनावां अर विकास रा कामां री प्रगति री समीक्षा बैठक मांय बोल रह्या हा। राज्यपाल आदिवासी हलकां मांय रीता ओहदा भरण सारू सगळा लेवल माथे कोशिशां करण बाबत् ई कहयो। वे कहयो के जनजाति हलकां मांय मजबूत स्वास्थ्य तंत्र विकसित करण अर आसानी ऊं सस्तो ईलाज मुहैया करावण माथे खास ध्यान देवणो चाहिजे।

राज्यपाल आदिवासी हलकां मांय रीता डॉक्टर, पैरामेडिकल स्टाफ़ अर शैक्षणिक अर गैर-शैक्षणिक ओहदां माथे नियुक्तियां करण माथे ई खास ध्यान देवण बाबत् कहयो। वे वंचित तबका रा विद्यार्थियां ने टेम सर उत्तर मैट्रिक छात्रवृत्ति अर वां रो पूरो चुकारो करण रा हुकम ई दीना। वे वज़ीफ़ा सारू अर्जी देवण री प्रक्रिया सहज अर आसान बणावण माथे ई ज़ोर दीनो।

00000

नुवा बणायी ज्या तीन आपराधिक कानून एक जुलाई 2024 ऊं लागू व्हे जावेला। आं मांय केई प्रावधान नुवा बणायी ज्या है। आं कानूनां रा बारा मांय जाग जगावण सारू आकाशवाणी समाचार जयपुर री ओर ऊं प्रादेशिक समाचार बुलेटिन मांय नुवी श्रृंखला सरू करी जा रही है। इण मांय आं कानूनां मांय करी ज्या नुवा प्रावधानां रा बारा मांय रोजीना जाणकारी दी जावेला। भारतीय न्याय संहिता 2023 मांय कोसबा रा बारा मांय प्रावधान जोडी ज्या है। अब स्नैचिंग ने धारा 304 रा तहत अपराध मान र 3 साल तांई री कैद अर जुर्माना रो प्रावधान करी ज्यो है। केई जणां कानी ऊं मिल र कोसबा ने ई न्हानो संगठित अपराध मानी ज्यो है। स्नैचिंग रा मामलां मांय करी ज्या नुवा प्रावधानां मांय मोबाइल फोन कोसबा रा वाकयां मांय संवेदनशील व्यक्तिगत डाटा, माली जाणकारी अर पासवर्ड री हिफाजत ने ध्यान राखता थकां कोसबा री वारदातां ने अपराध मानी ज्यो है। ऐडी वारदातां रे दौरान शरीर ने दुख व्हेवण री बात ने ई कानून मांय ठोड दीरीजी है।

00000

कोटा रा डकनिया तलाव रेलवे टेशन माथे 111 करोड़ रूप्या ऊं बत्ता खर्च ऊं कर्या जा रह्या विकास रा कामां रो आज कोटा मंडल रा रेल प्रबंधक जायजो लीनो। वे अहलकारां ने काम टेमसर पूरा करण रा हुकम दीना। डी.आर.एम. रावथा रोड़ रेलवे टेशन यार्ड रो ई दौरु कीनो। वे न्यारी-न्यारी मशीनां री जांच कीनी। वे रावथा रोड़ रा कंटेनर डिपो रो ई जायजो लीनो।

0000

गांधीनगर जयपुर टेशन माथे विकास रा कामां रे कारण 8 अर 9 जून ने रेलों री आवण जावण माथे असर पडेला। जम्मूतवी-अजमेर गाड़ी 8 जून ने खातीपुरा ऊं अजमेर जंक्शन बीचे नी चालेला। अजमेर-जम्मूतवी गाड़ी ई 9 जून ने अजमेर री ठौड़ खातीपुरा ऊं चालेला।

नई दिल्ली-अजमेर गाड़ी ई 9 जून ने खातीपुरा ताई ई चालेला। आ गाड़ी अजमेर नी जावेला। अजमेर-नई दिल्ली गाड़ी ई 9 जून ने दिल्ली सारु अजमेर री बजाय खातीपुरा ऊं चालेला।

00000

राज्य मांय आज मातृ शिशु स्वास्थ्य अर पोषण दिवस मणायी ज्यो। ई मौके सवाईमाधोपुर जिला मांय प्राथमिक, शहरी प्राथमिक, सामुदायिक स्वास्थ्य केंद्रां अर आंगनबाड़ी केंद्रां मांय आस वाळी महिलावां अर बच्चां रे टीका लगायी ज्या अर आस वाळी महिलावां ने गर्भावस्था, टीका लगावण, पोषण अर संतुलित आहार रा बारा मांय जाणकारी दीरीजी।

00000

सांचौर मांय प्रधानमंत्री फसल बीमा योजना रा तैत खास शिविर लगायी ज्यो। जिला कलेक्टर शक्ति सिंह राठौड़ शिविर मांय मौजूद किसानां सागे बातचीत करता थकां वां ने हर संभव मदद रो भरोसो दिरायो। शिविर मांय काश्तकारां रा साल 2022-23 मांय फसल बीमा दावा रा चुकारा मांय आ रही परेशानियां आगी करण सारु जरूरी कागजात ले र समुचित समाधान करी ज्यो। जिला रा बागोड़ा मांय साल 2022-23 मांय फसल बीमा दावा री रकम नी मिलण वाळा काश्तकारां सारु काल संवारे 9 बज्यां खास शिविर लगायो जावेला। दूजी कानी बीकानेर, हनुमानगढ़, श्रीगंगानगर अर चूरु जिलां रा पेंशन अर पारिवारिक पेंशन लेवण वाळां री समस्यावां रा निपटारा सारु पेंशनर अर पेंशनर्स कल्याण विभाग री ओर ऊं 12 जून ने बीकानेर मांय शिविर लगायो जावेला।

0000

डॉ. भीमराव अम्बेडकर राजस्थान दलित आदिवासी उद्यम प्रोत्साहन योजना रा तैत अनुसूचित जाति, जनजाति रा नौजवानां ऊं अर्जियां मांगी जा रही है। ई रा तैत पात्र नौजवानां ने नुवा उद्यम लगावण या मौजूदा उद्यम ने और बधावण सारु राज्य सरकार री ओर ऊं सस्ता कर्ज, मार्जिन मनी अर ब्याज माथे सब्सिडी समेत न्यारा-न्यारा सुबीता दिया जावेला।

00000

महाराजा गंगा सिंह विश्वविद्यालय बीकानेर रो आठवों दीक्षान्त समारोह काल राख्यो जावेला। विश्वविद्यालय रा कुलपति आचार्य मनोज दीक्षित आ जाणकारी दीनी। वे बतायो के राज्यपाल अर विश्वविद्यालय रा कुलाधिपति कलराज मिश्र री सदारत मांय विश्वविद्यालय रो स्थापना दिवस समारोह ई मनायो जावेला। कुलपति बतायो के दीक्षान्त समारोह मांय साल 2021 मांय व्ही परीक्षा मांय पास व्ह्या 1 लाख 26 हजार 880 विद्यार्थियां ने उपाधियां दे र नवाजा जावेला। इम्तेहान मांय अव्वल रेहवण वाळा 54 विद्यार्थियां ने सोना रा तमगा दे र नवाजा जावेला।

00000

जेठ महीना री अमावस रे मौके आज प्रदेश मांय खास व्रत-पूजन रा कार्यक्रम राख्यी ज्यो। टोंक मांय महिलावां वट री पूजा कर र बींद सारु अखंड सुहागिन रेहवण री कामना करता थकां कथा सुणी अर व्रत राख्यो। भीलवाड़ा मांय ई महिलावां मंगल गीत गाता थकां पीपळी रे मोली बांध र खास पूजा कीनी अर व्रत राख्यो। उदयपुर, बीकानेर अर हनुमानगढ़ मांय ई ई मौके खास पूजा अर्चना करी ज्यी।

00000

प्रदेश रा ऊगणी अर उतराद हलकां मांय आज ई हल्की बिरखा व्ही, हालांकि कैई जिला मांय तेज गर्मी रो असर रह्यो। प्रदेश मांय लारला चार-पांच दिन मांय व्ही बिरखा ऊं घणखर ठोड़ां लू रो असर खत्म व्हे ग्यो है अर पारो सामान्य ऊं नीचे दर्ज कर्यो जा रह्यो है। लारली रात घणखर ठोड़ां तापमान 25 ऊं 30 डिग्री सैल्सियस बीचे दर्ज करी ज्यो। मौसम विभाग काल ऊं 9 जून ताई अजमेर, जयपुर, कोटा अर भरतपुर संभाग रा कुछ हलकां मांय दोपहरां पाछे बादळां री गरज व्हेवण, आंधी चालण अर हल्की बिरखा व्हेवण रा आसार जताया है।

00000